

AUGLÝSING

um deiliskipulag í Þingvallahreppi. Aðkoma að þjóðgarði í landi Brúsastaða og Svartagils.

Samkvæmt skipulags- og byggingarlögum samþykkti hreppsnefnd Þingvallahrepps þann 18. júní 1999 deiliskipulag fyrir aðkomu að þjóðgarði í landi Brúsastaða og Svartagils. Markmið með deiliskipulaginu er að leysa vandamál varðandi aðkomu að þjóðgarðinum vegna kristnitökuhátíðar árið 2000, ásamt því að bæta aðkomu og aðstöðu ferðamana við Hakið.

Greinargerð og uppdættir hafa hlotið þá meðferð sem skipulags- og byggingarlög mæla fyrir um.

Deiliskipulagið öðlast þegar gildi.

Þingvallahreppi, 3. nóvember 1999.

F.h. hreppsnefndar Þingvallahrepps,

Ragnar Jónsson oddviti.

SKIPULAGSSKRÁ

fyrir Fræðslumiðstöð Vestfjarða.

1. gr.

Fræðslumiðstöð Vestfjarða er sjálfseignarstofnun með sérstaka stjórn. Heimili og varnarþing er á Ísafirði. Stofnunin ber ábyrgð á skuldbindingum sínum ásamt eignum. Stofnunin er ekki háð neinum lögaðilum.

2. gr.

Stofnendur Fræðslumiðstöðvar Vestfjarða verða þeir sem því til staðfestingar undirrita þessa stofnskrá.

3. gr.

Stofnendur leggja fram sameiginlega 500 þúsund króna stofnframlag til Fræðslumiðstöðvarinnar, sem skal vera óskerðanlegur höfuðstóll og ávaxtað með tryggilegum hætti. Fjárhagslegar skuldbindingar miðstöðvarinnar umfram stofnframlag eru stofnendum óviðkomandi.

4. gr.

Markmið Fræðslumiðstöðvar Vestfjarða er að efla menntun á Vestfjörðum og þá einkum að standa fyrir fræðslustarfsemi sem ekki heyrir undir námskrárbundið nám á grunn- og framhaldsskólastigi, nema sérstaklega verði um það samið. Í þessu sambandi skulu þarfir atvinnulífs í dreifðum byggðum sérstaklega hafðar í huga. Fræðslumiðstöðin hafi forgöngu um fræðslu á háskólastigi og fjarkennslu á sem flestum sviðum. Kennsluhættir miðist við mismunandi aldurshópa.

5. gr.

Við Fræðslumiðstöðina skal starfrækja fulltrúaráð, skipað einum fulltrúa frá hverjum eignaraðila og einum til vara. Fulltrúaráðið er æðsta stjórn miðstöðvarinnar og skiptir með

sér verkum. Hlutverk þess er að ákveða meginþætti í stefnu og starfstilhögun Fræðsluseturs Vestfjarða og setur það sér því starfsreglur.

6. gr.

Fulltrúaráðið skipar stjórn Fræðslumiðstöðvar Vestfjarða til tveggja ára í senn og skal stjórnin þannig skipuð: Tveir fulltrúar kosnir á aðalfundi fulltrúaráðs og einn fulltrúi tilnefndur af skólanefnd Framhaldsskóla Vestfjarða. Varamenn eru skipaðir með sama hætti. Stjórnin skiptir með sér verkum.

7. gr.

Stjórn Fræðslumiðstöðvar Vestfjarða ber að vinna að markmiðum miðstöðvarinnar og koma fram fyrir hennar hönd gagnvart þeim sem veita henni fjárhagslegan stuðning. Stjórnin ber ábyrgð á rekstri, fjárhag og eignum miðstöðvarinnar. Stjórnin ákveður meginþætti í stefnu og starfstilhögun miðstöðvarinnar og setur sér og henni starfsreglur.

8. gr.

Stjórn Fræðslumiðstöðvar Vestfjarða ræður framkvæmdastjóra sem annast daglegan rekstur og setur honum erindisbréf. Framkvæmdastjóri ber ábyrgð gagnvart stjórn miðstöðvarinnar. Hann undirbýr fjárhagsáætlun, vinnur að fjáröflun, annast reikningsskil og ræður annað starfsfólk.

9. gr.

Tekjur Fræðslumiðstöðvar Vestfjarða auk vaxta af stofnframlagi eru frjáls framlög frá ríki og sveitarfélögum, tekjur af þjónustu auk frjálsra framlaga frá einstaklingum, fyrirtækjum og samtökum og annars aflafjár. Tekjum og eignum Fræðslumiðstöðvar Vestfjarða má einvörðungu verja í samræmi við markmið stofnunarinnar.

10. gr.

Aðalaðsetur Fræðslumiðstöðvarinnar verður að Torfnesi í húsakynnum framhaldsskóla Vestfjarða samkvæmt sérstöku samkomulagi um leigu húsnæðisins. Gert er ráð fyrir að kennslubúnað vegna miðstöðvarinnar verði víðar að finna, t.d. í Þróunarsetri Vestfjarða og einnig utan Ísafjarðar.

11. gr.

Reikningsár Fræðslumiðstöðvarinnar er frá 1. janúar til 31. desember. Reikningar miðstöðvarinnar skulu endurskoðaðir af löggiltum endurskoðanda og einnig af kosnum endurskoðendum. Senda skal endurskoðaða reikninga til Ríkisendurskoðunar að loknum aðalfundi. Um reikningshald fer að lögum nr. 19/1988 um sjóði og stofnanir sem starfa samkvæmt staðfestri skipulagsskrá.

12. gr.

Aðalfundur fulltrúaráðs Fræðslumiðstöðvarinnar skal fara fram ár hvert í mars og boðar formaður fulltrúaráðsins til fundarins með a.m.k. tveggja vikna fyrirvara. Á aðalfund skal boða aðalmenn og varamenn, og hafa þeir síðarnefndu málfrelsi og tillögurétt. Með fundarboði aðalfundar skal senda áritaða reikninga. Dagskrá aðalfundar skal vera þannig:

1. Skýrsla stjórnar.
2. Afgreiðsla reikninga.
3. Breytingar á reglum miðstöðvarinnar.
4. Kosning stjórnar og endurskoðenda.

5. Starfsáætlun næsta árs.
6. Önnur mál.

13. gr.

Skipulagsskrá Fræðslumiðstöðvar Vestfjarða verður aðeins breytt á aðalfundi. Tillögur um breytingar þurfa að berast stjórn fyrir miðjan febrúarmánuð ár hvert. Senda skal breytingartillögur út með fundarboði aðalfundar. Tillögur skoðast samþykktar ef $\frac{2}{3}$ hlutar atkvæðisbærra manna samþykkja. Starfsemi miðstöðvarinnar verður einungis hætt ef aðalfundur samþykkir það með $\frac{2}{3}$ hlutum atkvæða. Verði starfsemin lögð niður renna eignir hennar til eflingar endurmenntunar og símenntunar á Vestfjörðum.

Leita skal staðfestingar dómsmálaráðherra á skipulagsskrá þessari, og breytingar á henni skulu einnig hljóta staðfestingu sama ráðherra.

Ísafirði, 28. ágúst 1999.

Skipulagsskrá þessi staðfestist hér með samkvæmt lögum um sjóði og stofnanir sem starfa samkvæmt staðfestri skipulagsskrá, nr. 19/1988.

Dóms- og kirkjumálaráðuneytinu, 3. nóvember 1999.

F. h. r.

Björn Friðfinnsson.

Fanney Óskarsdóttir.

Nr. 758

29. október 1999

SKIPULAGSSKRÁ

Fræðslunets Suðurlands ses.

Heiti og hlutverk.

1. gr.

Fræðslunet Suðurlands ses. er sjálfseignarstofnun með sérstaka stjórn sem hefur þann tilgang að vera tengiliður og miðla námi til íbúa á Suðurlandi á viðkomandi skólastigum og á þann hátt að styðja við fullorðinsfræðslu- og símenntun.

Heimili og varnarþing er á Selfossi. Stofnunin ber ábyrgð á skuldbindingum sínum með öllum eignum sínum. Hún er ekki háð neinum öðrum lögaðilum.

Stofnfé.

2. gr.

Stofnendur Fræðslunets Suðurlands eru allir þeir sem undirrita skipulagsskrá þessa þann 28. ágúst 1999 og leggja fram stofnframlög til fræðslunetsins.

Stofnendur leggja fram stofnframlög til Fræðslunets Suðurlands skv. eigin ákvörðunum. Heildarstofnfé skal eigi vera lægra en nemur kr. 1.000.000. Af stofnfé varðveitist á núgildandi verðlagi m.v. nvt. kr. 1.000.000 sem varanlegur höfuðstóll, sem óheimilt er að skerða. Fjárhagslegar skuldbindingar miðstöðvarinnar eru stofnendum óviðkomandi umfram stofnframlög.

Aðrir sem gerast vilja aðilar að sjálfseignarstofnuninni eftir 28. ágúst 1999 geta sótt um það til stjórnar fræðslunetsins, sem tekur ákvörðun með hvaða hætti viðkomandi geti gerst aðilar að Fræðsluneti Suðurlands ses.